

# Asia Tenggara digesa gembeleng kepakaran

KUALA LUMPUR, Rabu - Datuk Seri Dr Mahathir Mohamad meminta negara Asia Tenggara menggembeleng kepakaran dan sumber negara masing-masing secara kolektif bagi meningkatkan kestabilan, keselamatan dan kemakmuran serantau.

Perdana Menteri berkata, negara Asia Tenggara dikurniakan suasana yang boleh mengukuh dan memperluaskan kerjasama sesama sendiri.

“Segala peperangan dan kesengsaraan manusia yang pernah berlaku harus dipendam dalam sejarah rantau ini. Sejarah prasangka dan rasa takut sesama kita tidak harus dibiarkan mempengaruhi tindakan dan pemikiran kita.

“Kita mesti terus berusaha menentukan matlamat yang sama menerusi peningkatan kerjasama sesama kita dan negara di luar rantau ini.

“Justeru itu, kepakaran dan sumber negara Asia Tenggara harus digembeleng ke arah meningkatkan tahap kerjasama, kestabilan, keselamatan dan kemakmuran serantau,” katanya di majlis makan malam bagi meraikan Perdana Menteri Pertama Kemboja, Putera Norodom Ranariddh, di Sri Perdana, malam ini.

Putera Ranariddh dan rombongannya memulakan lawatan rasmi ke negara ini selama lima hari mulai hari ini.

Perdana Menteri berkata, Malaysia dan Kemboja boleh memberi sumbangan penting ke arah mencapai matlamat itu menerusi kerjasama dua hala dan penyertaan aktif dalam kerjasama serantau.

Sehubungan dengan itu, Perdana Menteri menyuarakan sokongan dan rasa gembira negara ini terhadap kesediaan dan minat Kemboja untuk menyertai Asean.